

BATAKURU YUUHANNA ARANURU NDUN

Fii Daaluyee Ngurndan dan

1 ¹Ko wonnoo kon gila ka fuddoode, ko dun men nani, men yi'iri gite amen den, men punnii, men meemiri juude amen den, dun ko daaluyee ngurndan dan.

²Awa, ngurndan dan feejii, men yi'ii dan, meden seeditanaade dan.Meden fejnjinande on *ngurndan poomayankejan dan, dan wondunoodan e Baabaajo on, dan fejnjinanaama men.³ Meden hollitude on onon kadi ko men yi'i kon e ko men nani kon fii no laatoron humondirbe e amen e nder humondiral men e Baabaajo on e Biddo makko on, dun ko Iisaa Almasiihu on.⁴ Meden windude dundoo fii no weltaare men nden timmira.

Fii Wonugol ka Ndaygu

⁵ E hino kibaaru mo men naniri mo on, meden banginande on mo: Alla ko ndaygu, niwre woo alaa e makko. ⁶Si en innii hidēn humondiri e makko, kono hidēn yahude e nder niwre nden, haray en fenii, en w提醒uraali goonga on.⁷ Kono si tawii hidēn yahude e nder ndaygu ngun, wano o woniri non kanko tigi ka nder ndaygu, haray hidēn humondiri, dun haray yiyan Iisaa Biddo makko on no *labbinde en e kala junuubu.

⁸ Si en innii en aldaa e junuubu, haray en daynitike enen tigi, dun haray goonga on alaa e men.⁹ Si en qirritike non junuubaaji men din, Alla ko Sella-Findeljo, Feewudo, o yaafanto en junuubaaji men din, o labbina en e kala bonnere.¹⁰ Si en innii en wadaali junuubu, haray en wadii mo fenoowo, dun haray daaluyee makko on alaa e men.

2 ¹Faybe an, mido windande on dundoo fii wota on wadu junuubu. Kono si goddo aru e wadude junuubu, haray hidēn mari Fattantoodo en moggo Baabaajo on, dun ko Iisaa Almasiihu, Feewudo on. ²Ko fii kanko tigi ko o sadaka fii no hebiren

yaafuyee junuubaaji men din,^a hinaa non fii di men din tun, kono ko fii di be aduna on fow.

³ Si en doftike yamirooje makko den, haray hidē felliti wonde hidē andi mo.

⁴ Kala on wi'udo no andi mo, hara o doftaaki yamirooje makko den, haray ko o fenoowo, goonga on alaa e makko. ⁵ Kono kala doftiido daaluyee makko on, haray giggol Alla ngol no timmi e makko, ko non andirten hidē humondiri e makko.

⁶ Kala on wi'udo no humondiri e makko, haray no haani wuuirerde wano

*Almasiihu on wuuirrnoo non.

⁷ Yiibbe, hinaa yamiroore heyre mi woni windande on, ko yamiroore hinnde, nde hebunodon gila ka fuddoode. Ndee yamiroore hinnde, ko ngol kongol ngol nanudon. ⁸ Kono fow e mun, ko yamiroore heyre mi woni windande on. Haqiiqa mayre on no bangi e makko, no bangi e mon, ko fii niwre nden no feyyude, awa kadi ndaygu haqiiqwatu ngun ndaygii toode.

⁹ On wi'udo no ka ndaygu e hoore ajugol musiddo mun, haray haa jooni himo ka niwre. ¹⁰ On mo yidi musiddo mun, haray himo ka ndaygu, peggal woo alanaa mo. ¹¹ Kono on ajudo musiddo mun ko ka niwre woni, ko e nder niwre o woni yahude, o andaa ka o woni yaarude, ko fii niwre nden wuminii gite makko den.

¹² Mido windande on, yo faybe, bay junuubaaji mondin yaaforaama sabu innde makko nden.

¹³ Mido windande on, yo baabiraabe, bay on andii on Woodanoodo gila ka fuddoode.

Mido windande on, yo sukaabe, bay on foolii bondo on.

¹⁴ Mi windanii on kadi, yo faybe, bay on andii Baabaajo on.

Mi windanii on kadi, yo baabiraabe, bay on andii Woodanoodo on gila ka fuddoode.

^a2.2 Wobbe kadi no faamira: «sadaka dahoowo tikkere Alla nden.»

Mi windanii on kadi, yo sukaabe, bay hidon tiidi, daaluyee Alla on no e mon, awa kadi on foolii bondo on.

Fii Ajugol oo Aduna Boyliido

¹⁵ Wota on yidu aduna on e ko woni e aduna on kon. On mo yidi aduna on, haray giggol Baabaajo on alaa e makko.¹⁶ Ko fii kala ko woni e oo aduna, dun ko mbeleede bandu e himmangol ko yi'i e mantorgol keyeeji aduna, hinaa e Baabaajo on iwri, kono ko e oo aduna.¹⁷ Awa oo aduna e himmeeji mun ko ko woni feyfude, kono on wadoowo faale Alla on luttay haa poomaa.

Fii Reenagol e Dartotoobe Almasiihu on ɓen

¹⁸ Awa, yo faybe, ko saa'i sakkitoro on nii. Wano nanirdon non, liddotoodo Almasiihu on aray, e hay fewndo doo toode liddotoobe Almasiihu on ciudube arii. Ko nii andirten wonde ko saa'i sakkitoro on nii.¹⁹ Ben non ko e men iwi, kono hinaa ɓe men, ko fii si ɓe wonno ɓe men, ɓe luttidayno e men. Kono dun banginii wonde ɓe fow wonaa ɓe men.

²⁰ Onon kan, *Seniido on yedii on Ruuhu mun on, ko dun wadi si on fow hidon mari andal.²¹ Mi windiranaali on wa si tawii on andaa goonga on, kono ko bay hidon andi, e hidon andi kadi wonde fenaande woo iwataa e goonga.²² Ko hombo non woni on fenoowo, si hinaa on yeddudo wonde Iisaa ko Almasiihu? On ko liddotoodo Almasiihu on, yeddudo Baabaajo on e Biddo on.²³ Awa kala yeddudo Biddo on hebaali Baabaajo on, kala qirritiido Biddo on, haray hebii Baabaajo on.

²⁴ Onon non, ko nanudon kon gila ka fuddoode no haani wonude ka berde mon. Si tawii ko nanudon kon gila ka fuddoode wonii ka berde mon, haray onon kadi on humondirii e Biddo on e Baabaajo on.²⁵ Awa e hino fodaari ndi o wadani en ndin: ko *ngurndan poomayankejan dan.

²⁶ Mi windiranii on dun e telen-ma wonbe daynude on ɓen.²⁷ Ko fii onon, Ruuhu mo hebirdon Almasiihu on no e mon, ko dun wadi on hatonjinaa e janneede,

kono, wano Ruuhu makko on woni jannirde on piiji dîn fow non, (ko mo goonga, mo aldaa e fenaande), humondiree e Almasiihu on wano Ruuhu makko on janniri on non.

Fii Faybe Alla 6en

²⁸Jooni non, yo faybe, humondiree e makko, fii, nde o feenoyi, yo en hebu hoolaare, e nde o ari, wota en hersu yeeso makko. ²⁹Si tawii hidon andi ko o Feewudo, haray andee kala wadudo ko feewi ko jibinanne makko.

3 ¹Ndaaree noone giggol ngol Baabaajo on yedi en ngol, haa noddaden faybe Alla. Awa kadi ko en dun. E hino ko wadi kon si aduna on andaa en, ko fii o andaali mo.

²Yibbe, jooni non ko en faybe Alla. Ko wonoyten kon feejninaaka taho. Kono hidan andi, nde o feenoyi, en nandoyay e makko, ko fii en yi'oyay mo wano o woniri non. ³Kala jogiido on tama'u e makko, haray no labbintinii wano kanko

*Almasiihu on o laabiri non.

⁴Kala non on wadudo junuubu, haray ontigi bonnii Sariya on, ko fii junuubu ko bonnugol Sariya. ⁵Kono hidon andi, kanko Almasiihu on ko o feeniri ko fii ittugol junuubaaji, e hin-le junuubu alaa e makko. ⁶Kala on humondirdo e makko duumotaako e wadugol junuubu.Kala non wadoowo junuubu, haray yi'aali mo, andaali mo.

⁷Ko onon, yo faybe, wota hay gooto daynu on, ko fii kala on wadudo ko feewi, haray ko feewudo, wano kanko Almasiihu on o woniri feewudo non. ⁸Kala non on wadoowo junuubu, haray ko mo Ibiliisa, ko fii gila ka fuddoode Ibiliisa no wadude junuubu. *Biddo Alla on-le ko feeniri ko fii mulugol kuude Ibiliisa den.

⁹Kala on jibinaado immorde e Alla duumotaako e wadugol junuubu, ko fii haray awdi Alla ndin no e makko, haray o waawataa wadude junuubu, bay ko e immorde e Alla woni ko o jibinaa. ¹⁰Awa e hino kobangini hakkunde faybe Alla

ben e faybe Ibuliisa ben: kala on mo wadataa ko feewi, haray hinaa mo Alla, ko wano non kadi on mo yidaa musiddo mun.

Fii Yidindirgol

¹¹ E hino kibaaru mo nanudon on gila ka fuddoode: yidindiren. ¹² Wota en wa'u wa Qaayiina^b, on mo Ibuliisa, warunoodo mijnjiraawo mun on. E ko fii hondun o warannoo mo? Ko tawde kuude makko den kanko Qaayiina ko bonde, de mijnjiraawo makko on den kan ko feewude. ¹³ Musibbe an, si tawii aduna on no aji on, haray wota on ɳaldu. ¹⁴ Ko fii hidēn andi ko e mayde iwuden, aruden e ngurndan, ɓay hidēn yidi musibbe men ben. On mo alaa giggol, haray ko ka mayde woni. ¹⁵ Kala on ajudo musiddo mun, haray ko waroowo. Hidon andi-le kala waroowo, haray *ngurndan poomayankejan alaa e makko.

¹⁶ E hino no andirten ko woni giggol: Almasiihu on okkitirii ngurndan mun dan fii men, haray enen kadi hidēn haani okkitirde ngurndan men dan fii musibbe men ben. ¹⁷ Si tawii goddo no mari ngaluuji aduna, o yi'ii musiddo makko sokoldo, o ombanii mo gite, haray ko honno giggol Alla ngol wonirta e makko? ¹⁸ Ko onon, yo faybe, wota en yidir kongol maa denngal tun, kono yidiren kuugal e goonga. ¹⁹ Ko nii andirten ko en ɓe goonga, ɓerde men den hebirta kadi hoolaare yeeso makko. ²⁰ Hay si ɓerde men den no felude en, Alla no buri ɓerde men den mawnude, e himo andi fow.

²¹ Awa, yo yibbe, si tawii ɓerde men den felaali en, haray hidēn mari hoolaare yeeso Alla. ²² Kala ko toriden mo, en hebiray mo, ɓay hidēn doftii yamirooje makko den, hidēn wadude ko welata mo. ²³ Awa e hino yamiroore makko nden: ko yo en gomdin innde Bidde makko on, dun ko Iisaa Almasiihu on, yidindiren kadi wano o yamiri en non. ²⁴ Kala on doftiido yamirooje makko den, haray no

^b3.12 «Qaayiina» no wi'ee kadi «Qaabila».Fud. 4

humondiri e Alla, Alla kadi no humondiri e makko. Awa kadi e hino no andirten wonde himo humondiri e men: ko *Ruuhu Senido mo o yedi en on andirden dün.

Fii Ndardagol Ruuhuji din

4 ¹Ko onon, yo yibbe, wota on hoolo kala neddo wi'udo Ruuhu Alla on no e makko, kono taskee 6e fii andugol si ruuhu wondo e mabbe on ko e Alla iwri, ko fii waditiibe annaba duudube arii e oo aduna. ²E hino no andirton si kongudi mabbe din ko e Ruuhu Alla on iwri: kala qirritiido wonde Iisaa Almasiihu on wontuno neddo, o ari ka aduna, haray ko mo Alla. ³Kala non mo qirritaaki Iisaa, haray hinaa mo Ruuhu Alla on, haray on ko mo liddotoodo *Almasiihu on, on mo nanunodon no arude. On non jooni no e aduna on.

⁴Ko onon, yo faybe, ko on 6e Alla, awa kadi on foolii waditiibe annaba 6en, ko fii Wondo e mon on no buri mawnude wondo e aduna on. ⁵Ben kobe oo aduna, ko dun wadi kongudi mabbe din ko di oo aduna, awa kadi aduna on no hedaaade di. ⁶Enen-le, ko en 6e Alla. Kala on andudo Alla hedoto en, kono on mo tawata non wonaa mo Alla hedotaako en. Ko non andirten Ruuhu Goongaajo on e ruuhu fenaandeejo on.

Fii Giggol Alla ngol e Yidindirgol men ngol

⁷Ko onon, yo yibbe, yidindiren, ko fii giggol ko ka Alla iwri, awa kala yidudo ko jibinaado immorde e Alla, haray himo andi Alla. ⁸Kala mo aldaa e giggol, haray andaa Alla, ko fii Alla ko giggol. ⁹E hino no giggol Alla ngol feeniri e men: Allaahu on addii Biddo makko bajjo on e nder oo aduna fii no w提醒ure immorde e makko. ¹⁰E hino ko woni ngol giggol kon: hinaa ko yiduden Alla kon, kono ko ko o yidi en kon, o addiri Biddo makko on sadaka fii no hebireen yaafuyee junubaaji men din. ¹¹Bay Alla yidirii en nii, yo yibbe, haray enen kadi hidan haani yidindirde. ¹²Hay gooto yi'aali Alla haa hande, kono si en yidindirii, haray Alla no humondiri e men, giggol makko wonungol e men ngol timma.

¹³ E hino no andirten hidēn humondiri e makko, kanko kadi himo humondiri e men: ko sabu Ruuhu makko mo o yedī en on. ¹⁴ Menen non men yi'ii, meden seeditaade wonde Baabaajo on nulii Biddo on fii dandugol aduna on.¹⁵ Kala on qirritiido wonde Iisaa ko *Biddo Alla, haray Alla no humondiri e makko, kanko kadi himo humondiri e Alla. ¹⁶ Awa, enen en andii, en gomdinii giggol ngol Alla yidī en ngol.

Alla ko giggol. Kala on wondudo e giggol, haray himo humondiri e Alla, Alla kadi no humondiri e makko.¹⁷ Ko nii giggol ngol timmiri e men, fii no hebiren hoolaare jānande jaawoore nden. Wano o woniri non kanko, enen kadi ko non wonirden e oo aduna. ¹⁸ Kulol alaa e nder giggol, kono giggol timmungol radoto kulol, bāy kulol no tijjii donkineede. Awa kadi, kala on huludo, haray giggol ngol timmaa e makko.¹⁹ Enen non hidēn yidī, bāy ko kanko adii en yidude. ²⁰ On mo wi'i no yidī Alla, e hoore himo aji musiddō makko, haray ko fenoowo. Ko fii on mo yidaali musiddō mun mo o renti on, haray o waawataa yidude Alla mo o rentaa on. ²¹ Awa, ko ndee yamiroore doo hebirden mo: mo no yidī Alla, yo yidū kadi musiddō mun on.

Fii Gomdingol Biddo Alla on

5 ¹Kala on gomdindo wonde ko Iisaa woni *Almasiihu on, haray ko jibinaado immorde e Alla, e kala yidudo Baabaajo on yiday Biddo on kadi. ² E hino no andirten hidēn yidī faybe Alla ben: ko si en yidii Alla, en doftike yamirooje makko den. ³ Ko woni yidugol Alla: ko doftagol yamirooje makko den. Yamirooje makko den-le hinaa sattude, ⁴ ko fii on jibinaado ka Alla foolay oo aduna. Awa e hino polgal foolungal aduna on: ko gomdinal men ngal. ⁵ Ko hombo woni on fooludo aduna on, si hinaa on gomdindo wonde Iisaa ko *Biddo Alla?

⁶ Ko kanko Iisaa Almasiihu on ardi e ndiyan e yiyan, hinaa non ndiyan tun o ardi, kono ko ndiyan e yiyan. Awa ko Ruuhu Allaahu on woni seeditaade, bāy on Ruuhu ko o goonga. ⁷ Ko fii ko piiji tati woni seeditaade: ⁸ ko Ruuhu Allaahu on e

ndiyan dan e yiyan dan, din non tati hidî fotti.⁹ Hiden jabude seeditooje yimbe ben, kono ko seeditoore Alla nden buri mawnude, dun ko seeditoore nde Alla seeditii fii Biddo makko on nden.¹⁰ Kala on gomdindo Biddo Alla on, haray nden seeditoore no e makko. Kono on mo gomdinaa Alla non, haray o wadii mo fenoowo, ko fii haray o gomdinaa seeditoore nde Alla seeditii fii Biddo mun on nden.¹¹ Awa e hino nden seeditoore: Alla okkii en *ngurndan poomayankejan, dan ngurndan non no e Biddo makko on.¹² Kala humondirdo e Biddo on no mari ngurndan dan. Kala mo humondiraa e Biddo Alla on haray alaa dan ngurndan.

Fii Kongudi Rawnordi din

¹³ Mi windanii on dun fii no andiron wonde hidon mari ngurndan poomayankejan, onon bee gomdinbe e innde Biddo Alla on.¹⁴ Awa e hino hoolaare nde battorten Alla nden: si en torike mo godfun ko yaadi e faale makko on, o hedoto en.¹⁵ Bay non hiden andi himo hedii kala ko toriden mo, haray hiden andi en hebii ko toriden mo kon.¹⁶ On mo yi'i musiddo mun no wada junuubu mo nawrataa e mayde, yo o torano mo, Alla yeday mo ngurndan, dun non ko ben wadoobe junuubu mo nawrataa e mayde. Kono no woodi junuubu nawroowo e mayde, hinaa fii on junuubu mi wi'i yo tore.¹⁷ Kala ko aldaa e peewal ko junuubu, kono no woodi non junuubaaji di nawrataa e mayde.

¹⁸ Hiden andi kala on jibinaado immorde e Alla, o duumotaako e wadugol junuubu, kono Biddo Alla on reenay mo, danda mo, hara Bondo on meemataa mo.¹⁹ Hiden andi ko en be Alla, awa kadi aduna on fow no e ley doole Bondo on.²⁰ Hiden andi kadi Biddo Alla on arii, o okkii en faamu fii andugol Goongaajo on. Hiden humondiri-le e Goongaajo on, bay hiden humondiri e Biddo makko on, dun ko Iisaa Almasiihu. Ko on woni Alla Goongaajo on e ngurndan poomayankejan dan.

²¹ Ko onon, yo faybe, reenee e sanamuji din!

PREMIÈRE ÉPÎTRE DE JEAN

en Langue Pular (Fouta-Jalon)

République de Guinée

© 2013 Traducteurs Pionniers de la Bible

en collaboration avec

Mission Protestante Réformée